



Broj: 01-50-1-15-50/09.
Sarajevo, 1. aprila 2009. godine

DOM NARODA
PARLAMENTARNE SKUPŠTINE
BOSNE I HERCEGOVINE

PREDMET: O b a v j e š t e n j e

Predstavnički dom Parlamentarne skupštine BiH održao je, 1. aprila 2009., svoju 50. sjednicu. Obavještavam vas o razmatranju materijala koji su u nadležnosti i Doma naroda. Razmatrane su tačke kako slijedi:

1. Prijedlog zakona o izmjenama i dopunama Zakona o Agenciji za rad i zapošljavanje BiH (drugo čitanje);
2. Prijedlog zakona o izmjenama i dopunama Zakona BiH o izvršenju krivičnih sankcija, pritvora i drugih mjera (drugo čitanje);
3. Prijedlog zakona o izmjenama i dopunama Zakona o policijskim službenicima (drugo čitanje);
4. Prijedlog zakona o izmjenama i dopunama Zakona o odbrani BiH, s Mišljenjem Zajedničke komisije za odbranu i sigurnost;
5. Prijedlog zakona o izmjenama i dopunama Zakona o službi u Oružanim snagama BiH (prvo čitanje);
6. Prijedlog zakona o izmjenama i dopunama Zakona o Državnoj agenciji za istrage i zaštitu (prvo čitanje);
7. Prijedlog zakona o izmjenama i dopunama Zakona o Graničnoj policiji BiH (prvo čitanje);
8. Prijedlog zakona o graničnoj kontroli (prvo čitanje);
9. Prijedlog zakona o finansijskom lizingu (prvo čitanje);
10. Prijedlog okvirnog zakona o osnovama naučnoistraživačke djelatnosti i koordinaciji unutrašnje i međunarodne naučnoistraživačke saradnje BiH (prvo čitanje);
11. Prijedlog revidirane strategije Bosne i Hercegovine za provođenje Aneksa VII. Dejtonskog mirovnog sporazuma (prijedlog: Vijeća ministara BiH);
12. Izvještaj o radu i poslovanju Radio- televizije Bosne i Hercegovine za 2007. godinu;
13. Izvještaj o finansijskom poslovanju Radio-televizije Bosne i Hercegovine u 2007. godini;
14. Izvještaj o radu zajedničkih komisija za 2008. godinu:
 - a) Zajedničke komisije za odbranu i sigurnost BiH,
 - b) Zajedničke sigurnosno-obavještajne komisije za nadzor nad radom Obavještajno – sigurnosne agencije BiH,
 - c) Zajedničke komisije za ekonomske reforme i razvoj,
 - d) Zajedničke komisije za evropske integracije,
 - e) Zajedničke komisije za administrativne poslove,
 - f) Zajedničke komisije za ljudska prava, prava djeteta, mlade, imigraciju, izbjeglice, azil i etiku;
15. Izvještaj o radu Ureda za razmatranje žalbi zu 2008. godini;
16. Izvještaj Zajedničke komisije o nastojanju za postizanje saglasnosti o identičnom tekstu Zakona o dopuni Zakona o Javnom radiotelevizijskom sistemu BiH;

17. Davanje saglasnosti za ratifikaciju:

- a) Sporazuma o naučnotehničkoj saradnji između Vijeća ministara BiH i Vlade Crne Gore,
- b) Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore za 2007. godinu, na osnovu instrumenta za pretpristupnu pomoć, komponenta II – prekogranična saradnja,
- c) Aranžmana između Vijeća ministara BiH i Vlade Republike Koreje vezano za zajam iz sredstava Fonda za unapređenje ekonomske saradnje,
- d) Sporazuma između Vijeća ministara BiH i Vlade Republike Bugarske o međunarodnom drumskom prijevozu putnika i roba,
- e) Sporazuma između Kraljevine Belgije i Republike Albanije, Bosne i Hercegovine, Republike Hrvatske, Bivše Jugoslovenske Republike Makedonije, Republike Moldavije, Crne Gore, Republike Srbije i Misije za privremenu upravu UN-a na Kosovu, u ime Kosova, u skladu s Rezolucijom Vijeća sigurnosti UN-a 1224 o privilegijama i imunitetima Sekretarijata Sporazuma o slobodnoj trgovini u Centralnoj Evropi,
- f) Ugovora o izvedbama i fonogramima Svjetske organizacije za intelektualno vlasništvo i
- g) Ugovora o autorskom pravu Svjetske organizacije za intelektualno vlasništvo.

Ad. 1.

Predstavnički dom usvojio je u drugom čitanju Prijedlog zakona o izmjenama i dopunama Zakona o Agenciji za rad i zapošljavanje BiH s amandmanima koje je usvojila nadležna komisija, kako slijedi:

Amandman I.

U članu 1. Prijedloga zakona riječ „administrativne“ briše se.

Amandman II.

U članu 2. Prijedloga zakona koji se odnosi na član 6. Zakona mijenjaju se tačke a), d), m) i n) koje glase:

„a) u oblasti zapošljavanja iz svoje nadležnosti predstavlja Agenciju i saraduje s nadležnim agencijama, institucijama i međunarodnim organizacijama u tim oblastima;“

„d) inicira zaključivanje međunarodnih ugovora u oblasti zapošljavanja i učestvuje u vođenju pregovora za zaključivanje međunarodnih ugovora u oblasti socijalnog osiguranja za dio nezaposlenosti i prati njihovo provođenje u saradnji sa zavodima za zapošljavanje entiteta i Brčko Distrikta BiH;“

„m) u saradnji s entitetskim zavodima za zapošljavanje i Zavodom za zapošljavanje Brčko Distrikta BiH, osigurava neophodne podatke u oblasti nezaposlenosti, posebno onih koji se odnose na izvršavanje međunarodnih obaveza;“

„n) dostavlja svoje redovne godišnje izvještaje o radu i godišnje programe rada Vijeću ministara.“

Amandman III.

U članu 3. Prijedloga zakona koji se odnosi na član 7. Zakona, u novom stavu (2) nakon riječi „saglasnost“ stavlja se tačka, a riječi: „putem resornog ministarstva BiH i uz njegovo mišljenje“ brišu se.

Amandman IV.

U članu 4. Prijedloga zakona koji se odnosi na član 9. Zakona, prva rečenica mijenja se i glasi: “Direktor Agencije ima jednog zamjenika koji pomaže direktoru u vođenju Agencije.“

Amandman V.

Član 5. Prijedloga zakona briše se.

Brisanjem člana 5. članovi 6., 7., 8. i 9. postaju članovi 5., 6., 7. i 8.

Ad. 2.

Usvojen je u drugom čitanju i Prijedlog zakona o izmjenama i dopunama Zakona BiH o izvršenju krivičnih sankcija, pritvora i drugih mjera, sa sljedećim amandmanima:

Amandman I.

U članu 13. u novom članu 100a., u stavu (2), riječi: „sud koji vodi krivični postupak“ mijenjaju se riječima: „Sud Bosne i Hercegovine ili drugi sud u Bosni i Hercegovini kad je na njega Sud Bosne i Hercegovine prenio vođenje postupka.“

Amandman II.

U članu 22. u novom članu 168a., u stavu (3) na kraju teksta umjesto tačke dodaje se zarez i riječi: „, po prethodnoj saglasnosti ministarstva pravde tog entiteta.“

Na prijedlog iz rasprave usvojen je i sljedeći zaključak:

Zadužuje se Ustavnopravna komisija Predstavničkog doma da, po objavljivanju Zakona o izmjenama i dopunama Zakona BiH o izvršenju krivičnih sankcija, pritvora i drugih mjera u „Službenom glasniku BiH“, u najkraćem roku pripremi Prečišćeni tekst Zakona BiH o izvršenju krivičnih sankcija, pritvora i drugih mjera, radi otklanjanja svake sumnje u njegovu primjenu.

Ad. 3.

Prijedlog zakona o izmjenama i dopunama Zakona o policijskim službenicima usvojen je u predloženom tekstu.

Ad. 4.

Nije usvojeno Mišljenje Zajedničke komisije za odbranu i sigurnost o Prijedlogu zakona o izmjenama i dopunama Zakona o odbrani BiH, pa je tako Prijedlog zakona vraćen Komisiji na ponovno razmatranje i dostavljanje novog mišljenja o principima.

Ad. 5, 6. i 7.

Usvojeni su u prvom čitanju:

- Prijedlog zakona o izmjenama i dopunama Zakona o službi u Oružanim snagama BiH,
- Prijedlog zakona o izmjenama i dopunama Zakona o Državnoj agenciji za istrage i zaštitu i
- Prijedlog zakona o izmjenama i dopunama Zakona o Graničnoj policiji BiH.

Ad. 8.

Prijedlog zakona o graničnoj kontroli u prvom čitanju nije dobio entitetsku većinu. Odmah je provedeno usaglašavanje u Kolegiju kao komisiji. Nije bilo saglasnosti, pa je u drugom krugu glasanja Prijedlog zakona odbijen s obzirom da je protiv glasalo dvije trećine poslanika iz entiteta.

Ad. 9.

Prijedlog zakona o finansijskom lizingu također je odbijen u prvom čitanju, nakon što nije dobio entitetsku većinu i nakon što je, poslije usaglašavanja u Kolegiju kao komisiji, u drugom krugu glasanja protiv Prijedloga zakona glasalo dvije trećine poslanika iz entiteta.

Ad. 10.

Prijedlog okvirnog zakona o osnovama naučnoistraživačke djelatnosti i koordinaciji unutrašnje i međunarodne naučnoistraživačke saradnje BiH usvojen je u prvom čitanju.

Ad. 11.

U raspravi o Prijedlogu revidirane strategije Bosne i Hercegovine za provođenje Aneksa VII. Dejtonskog mirovnog sporazuma predloženo je više zaključaka, pa je, prilikom glasanja usvojen prijedlog da se o Prijedlogu revidirane strategije odgodi izjašnjavanje, a da se predloženi zaključci upute nadležnoj komisiji radi razmatranja i dostavljanja Domu konzistentnih zaključaka.

Ad. 12. i 13.

Predstavnički dom usvojio je zaključke Komisije za saobraćaj i komunikacije i Komisije za finansije i budžet, predložene u njihovim mišljenjima, kojim je zatraženo od Upravnog odbora RTV BiH da do kraja aprila 2009. godine dostavi izvještaj o radu i poslovanju RTV BiH za 2007. i 2008. godinu i izvještaj o radu Upravnog odbora za isti period, kao i izvještaj o finansijskom poslovanju RTVBiH za 2007. i 2008. godinu. Također je zatraženo od Upravnog odbora da do kraja aprila 2009.godine dostavi plan sanacije i konsolidacije poslovanja RTVBiH.

Ad. 14.

Predstavnički dom usvojio je izvještaje o radu zajedničkih komisija, uz zaključak predložen u raspravi, koji glasi:

Na osnovu Zakona o Obavještajno-sigurnosnoj agenciji BiH, Predstavnički dom PSBiH traži od predsjedavajućeg Vijeća ministara BiH i Predsjedništva BiH da ispune svoje zakonske obaveze iz navedenog zakona u pogledu dostavljanja izvještaja, informacija i Platforme.

Ad. 15.

Predstavnički dom usvojio je Izvještaj o radu Ureda za razmatranje žalbi za 2008. godinu, uz usvajanje zaključaka koje je predložila nadležna komisija, kao i određenih zaključaka predloženih u raspravi.

Ad. 16.

Usvojen je Izvještaj Zajedničke komisije o usaglašavanju identičnog teksta Zakona o dopuni Zakona o Javnom radiotelevizijskom sistemu Bosne i Hercegovine.

Ad. 17.

Predstavnički dom dao je saglasnost za ratifikaciju svih sporazuma i ugovora iz ove tačke dnevnog reda.

Radi informiranja, obavještavam vas da Predstavnički dom nije usvojio negativno Mišljenje Ustavnopravne komisije o Prijedlogu zakona o izmjenama i dopunama Zakona o sportu u BiH koji je Domu predložio Dom naroda Parlamentarne skupštine BiH.

Također vas obavještavam da je Dom usvojio zahtjev Komisije za saobraćaj i komunikacije za produženje roka za dostavljanje izvještaja o Prijedlogu zakona o poštama BiH, pa je tako krajnji rok za dostavljanje izvještaja o ovom prijedlogu zakona 27. 4. 2009.

S poštovanjem,

PREDSJEDAVALJUĆI
PREDSTAVNIČKOG DOMA
Beriz Belkić

